

Sindicato STA ta haya cu:

‘Serlimar mester privatisa su mes’

ORANJESTAD - AAA, APA WEB y ANSA por ehempel, tur a wordo privatisa. Pa Serlimar haya bida, STA ta kere direccin di un NV lo ta hopi mas miho. Awor e instancia ta un Sui Generis, pues independiente di gobierno pero no tanto asina cu un NV.

Den un NV no ta haya e ‘metemento di pata’ asina hopi di gobierno, aunke cu e metemento ey ta bin den cualkier NV como gobierno ta keda doño 100% di dje. Pero e ta crea un espacio pa traha independiente, presidente di STA Diego de Cuba ta bisa.

Sr. de Cuba a sigui splica cu privatisacion ta crea espacio pa traha eficiente y determina tur reglanan, por cera contracto colectivo entre otro. Banda di esaki e compania tin caminda habri den caso cu tin un plan di negoshi atractivo cu ta demostra cu ta bay genera suficiente placa cu por sostene bo mes, consecuentemente por bay haci cierto prestamonan na banco, pa por engrandece bo mes.

Esaki no ta e caso aworaki cu Serlimar. “Tin demasiado placa riba caya, cual no ta saludabel pa e compania.”


Recogemento sushi

“Aworaki tin mas o menos 40 mil punto di recoge sushi rond Aruba, mester bay wak con ta bay socialisa esey si, pasobra ta mas cu husto cu esun cu ta ocasiona mas desperdicio, esey lo tin cu paga mas.” STA ta pensa cu esaki ta logico, pero mester pensa e ora ey atrobe con ta bay cobra esaki.

E pregunta aki ta keda uno fastioso. Pero sr. De Cuba ta keda para riba e punto di salida pa e situacion aki, cu Serlimar mester bira un NV prome cu haci esaki.

Segun e, Gobierno a bay parlamento pa aproba un subsidio di 16 milyon pa continuidad di Serlimar.

Serlimar ta un compania di Aruba y mester haci tur cos posibel pa garantisar su continuidad y salario di trahadonan en cuestion. STA no kier pa locual a pasa cu APA pasa cu Serlimar, unda parti



di patrimonio di Aruba ta wordo bendi na prijs di ‘baca flaco’.

Peso di eleccion

Locual a pasa net prome cu eleccion un cantidad di hende a wordo hinca den Serlimar, segun e lider sindical. Esaki a pisa hopi riba e presupuesto di Serlimar, ta papia di casi 600 mil florin pa luna extra. “Esey tabata algo cu e

gobierno no mester a haci e tempo ey. Esaki ta e consecuencia ora cu un compania ta den man di gobierno. Si e compania ta un NV, e ta bira hopi diferente.”

Ultimo palabracion cu gobierno

Gobierno lo ta papiando cu Ecogas cu ya ta procesando 30 % di e sushi. E posibilidad ta keda cu por

bin acuerdo bou di e dos companianan. Si esaki pasa, sindicato mester wordo poni na altura, pa sa kico ta pasa cu e trahadonan.

“Por ta, cu ta diversifica y cu e empleadonan lo mester bay wordo educa riba otro funcion. Den cualkier situacion, STA ta para firme tras di cu e compania mester keda existi”, sr. De Cuba ta finalisa. □